

Animar da leger pretenda atmosfera

La biblioteca en Casa De Mont a Laax festivescha in pign giubileum

■ (abc) Quest meins festivescha la biblioteca Laax il giubileum da tschun onns. En vesta als novs mieds electronics, che concurrenzeschan ferm il cudisch, pareva l'avertura d'ina biblioteca ina resca. Carschi ed affons frequentan denton fetg stedi la Casa De Mont a Laax. «Ei fa plascher da luvrar en quei menaschi e per quella clientela», manegia *Corina Walser*, la menadra dalla biblioteca Laax. Era sia collega *Marionna Tschuor* ei dil medem meini. Mintga treis meins s'entaupan ellas cun lur collegas *Elisabeth Coray*, *Regula Caduff*, *Barbara Rupp* ed *Elisabeth Coray* en Casa De Mont. Las responsablas dalla biblioteca Laax schubregian finiastras, prendan si plantschius, fan giu la puorla. Tgirar e tener schuber la biblioteca ei lavur da team.

Biars clients dils vitgs vischinonts

Quest meins festivescha la biblioteca Laax siu tschunavel anniversari. Cun bia

idealissem ha il Cerchel cultural Laax realisau quella, cun sustegn dalla fundaziun Pro Laax ha ella saviu endrizzar localitads el tschaler dalla casa patriziala. Cul medem idealissem han la cumissiun da biblioteca e la squadra dallas biblioteccaras entschiet a luvrar e s'engaschar en Casa De Mont. Tochen avon treis meins ha *Aita Dermont* presidiau quella cumissiun, sia successura ei dapi lu *Carlina Schluop*.

Sco Marionna Tschuor e Corina Walser declaran a LQ, ha la biblioteca Laax anflau accoglientscha ella popolaritad. Las localitads dalla biblioteca deraan in cert ruaus e cumadeivladad. L'atmosfera ellas differentas stanzas culs mirs vegls, ils arviuls e las preits alvas animeschan da prender peda ellas crunas. «Biaras mummas ed affons, buca mo da Laax, era da Sagogn, Falera e Schluein, vegnan regularmein tier nus», gin ellas.

La statistica dils emprests cumprova

quei. Igl onn 2001 ha la biblioteca Laax empristau 8781 mieds, da quels 2077 cassetas e videos. In grond avantatg dalla biblioteca ei il parcadi gest avon casa. Oravontut ils clients dils vitgs vischinonts apprezieschan quels. Che la biblioteca ei buc integrada egl areal dalla scola – sco usitau els biars loghens – ei gnanc in disavantatg. Ils affons vegnan tuttina en biblioteca. Cudischs ils pli actuals, bellectristica, cudischs dil fatg, publicaziuns dil Grischun ed oravontut dalla Surselva s'audan tier la purschida speciala dalla biblioteca Laax. La Casa De Mont giudem il vitg da Laax ei en scadin cass s'establida. Regularmein organisescha la biblioteca era occurrenzas publicas per carschi ed affons.

Mesjamna proxima, ils 5 da zercladur ha liug ina fiastetta da giubileum. Il suentermiezgi han liug teater da casparets pils pigns allas 14.30. Allas 16.00 san ils affons dad 8 onns ensi mirar in film da sorpresa. L'occurrenza ei cumbinata cun giugs per pign e grond sil parcadi.